



**Nepal** Knútur Óskarsson hefur skipulagt ferðir til Nepals og veitir nú áritanir til landsins í Suður-Asíu.

## Framtíð í ferðamennsku

- Stjórnvöld í Nepal vekja athygli ferðamanna á landinu
- Knútur Óskarsson kjöræðismaður lætur sig lífsgæði varða

Steinþór Guðbjartsson  
steinthor@mbl.is

Frá og með 1. janúar 2020 geta ferðamenn á leið til Nepals fengið áritanir í vegabréf á ræðisskrifstofu Nepals á Íslandi, en til þessa hafa Íslendingar þurft að sækja um áritanir til landsins hjá sendiráði Nepals í Kaupmannahöfn.

Knútur Óskarsson er nýskipaður kjöræðismaður fyrir Nepal á Íslandi. Hann var lengi í ferðamannabransanum, „fæddist inn í hann“, eins og hann orðar það og vísar til þess að faðir hans hafi rekið sumarhótel á Laugum í Reykjadal í Suður-Pingeyjarsýslu. Hann hóf störf í ferðamálu að loknu háskólaprófi í viðskiptafræði 1977 og kynntist þá Nepal. „Góður vinur minn, David Oswin, var með ferðaskrifstofu í Bretlandi og fór alltaf með hópum á staði, sem hann seldi ferðir á. Hann sagði eitt sinn við mig að það væru aðeins tveir staðir sem væru þess virði að heimsækja endurtekið,

Nepal og Ísland.“ Knútur segist hafa farið með þessum vini sínum nokkrum sinnum í sendiráð Nepals í Lundúnum, kynnst starfsfólki þar og eitt hafi leitt af öðru.

### Herferð í gangi

Verkefni Knúts sem kjöræðismanns eru fyrst og fremst að gæta hagsmuna nepalskra stjórnvalda á Íslandi. Hann segir að nú sé að byrja sérstök herferð þeirra í þeim tilgangi að vekja athygli á landinu sem áfangastað á næsta ári og liður í því sé að endurvekja starf kjöræðismanns hérlandis. „Stjórnvöld í Nepal vilja gera allt sem þau geta til þess að styrkja efnahaginn og þau sjá framtíð í ferðamennskunni.“

Knútur hefur verið verkefnastjóri og stjórnarformaður hjá Endurhæfingu – þekkingarsetri í Kópavogsgarði 10 í Kópavogi frá maí 2004 og sinnir þar jafnframt kjöræðismannsstörfunum. Eiginkona hans, Guðný Jónsdóttir sjúkrahjálfari, er

framkvæmdastjóri fyrirtækisins, sem veitir sérhæfða endurhæfingarþjónustu og íhlutun vegna velferðartækni fyrir fatlað fólk á höfuðborgarsvæðinu og víðar um land ásamt endurhæfingu fyrir Rjóðrið, hvíldar- og endurhæfingarheimili fyrir langveik og fötlud börn. „Eftir að hafa unnið við ferðarþjónustu um árabil sneri ég mér að því að viðhalda lífsgæðum á annan hátt,“ útskýrir hann og leggur áherslu á að starfsemin byggist á þjónustusamningi við Sjúkratryggingar Íslands.

Íslendingar ferðast víða og margir hafa lagt leið sína til Nepals. Knútur skipulagði ferðir þangað á sínum tíma og hann bendir á að íslenskar ferðaskrifstofur séu reglulega með ferðir til landsins auk þess sem margir, ekki síst fjallgöngufólk, fari þangað á eigin vegum. „Í samfélagi Nepala á Íslandi eru um 200 manns og það er gaman að tengjast því og íslenskum ferðamönnum með þessum hætti,“ segir hann um kjöræðisstarfið.